

**POTVRĐENO**

Provjeravali zakonitost javnih nabavki „BH Telecoma“

# SIPA predala nalaze istrage Tužilaštvu BiH

Poslovanje državne kompanije godinama prate afere • Analizirane javne nabavke, među kojima je kupovina zgrade na Marindvoru • Ima li snage za obračun s korupcijom

Državna agencija za istrage i zaštitu (SIPA) dostavila je Tužilaštvu BiH prikupljenu dokumentaciju o poslovanju „BH Telecoma“, koja je bila predmet istražnih radnji u avgustu prošle godine, potvrđeno nam je iz ove agencije.

No, iz Tužilaštva BiH jučer nismo mogli dobiti odgovor kada će i hoće li biti donesena tužilačka odluka o pokretanju zvanične istrage ili podizanju optužnice. Poslovanje ove firme već godinama prate ozbiljne afere, a iz međunarodnih i nevladinih organizacija odavno upozoravaju da ona služi kao bankomat vladajućim strankama.

## Mjere i radnje

Po naredbi Tužilaštva BiH, SIPA je iz „BH Telecoma“ prošle godine izuzela dokumentaciju koja se odnosila na javne nabavke, ali i dokumentaciju o kupovini nove poslovne zgrade na



„BH Telecom“: Skupo platili objekt u izgradnji

Marindvoru, čiju su nabavku i gradnju pratile brojne nepravilnosti.

„Službenici SIPA-e u slučaju „BH Telecoma“ izvršili su potrebne mjere i radnje naložene naredbom

Tužilaštva BiH te prikupili određenu dokumentaciju koja je bila predmet analize, nakon čega je ona uz Izvještaj o poduzetim mjerama i radnjama dostavljena Tužilaštvu BiH na daljnje postupanje - rekla nam je jučer Kristina Jozić, portparol SIPA-e.

Iz izvora bliskih istrazi saznajemo da su, između ostalog, analizirane nabavke softvera, novih automobila, ali i druge vrijedne opreme, na šta su potrošeni milioni maraka.

Samo za kupovinu novih automobila u posljednje dvije godine potrošeno je blizu 7,7 miliona KM.

Nezvanično saznajemo da je SIPA Tužilaštvu BiH podnijela i izvještaj o porijeklu imovine Bakira Čelosmanovića, izvršnog direktora za pravne poslove, ali i Halila Novalića, direktora odjela firme „BH Line“. SIPA-u je posebno za-

nimala njihova imovina, čija se vrijednost, navodno, za nekoliko godina utrostručila.

## Broj kvadrata

Poseban dio istrage odnosi se na kupovinu nedovršene zgrade na Marindvoru, što je ovu državnu firmu koštalo s porezima 35,5 miliona KM, a objekt je kupljen u vrijeme izborne 2010. godine. Nabavku ove zgrade pratile su brojne afere, a proces je vodio Jasminko Akšamija, direktor za investicije u „BH Telecomu“ i zet Bakira Izezbegovića, člana Predsjedništva BiH.

Zgrada je kupljena iako Uprava prije zaključenja kupoprodajnog ugovora uopće nije provjerila tačan broj kvadrata niti je objekt u potpunosti imao urbanističku saglasnost i građevinsku dozvolu, utvrdili su federalni revizori

u izvještaju o poslovanju firme za 2013. godinu. Utvrđeno da je od samog početka favorizirana nabavka određenog objekta, a da je cijeli proces kupovine neopravdano dug i skup.

M. AŠČIĆ

## Probili budžet za reklame

Iz izvora bliskih „BH Telecomu“ saznajemo da je interna kontrola utvrdila da je ova firma prošle, izborne godine probila

budžet za sponzorstva i reklame.

Umjesto planiranih 12 miliona KM, potrošeno je 15 miliona KM.



ČELOSMANOVIĆ: Obuhvaćen istragom